

TE HHHHURAA API

I neia i te piha neneiraa na te Ekalesia a Iesu Mesia i te Feia
Mo'a i te Mau Mahana Hopea Nei i Papeete, Tahiti.
i te mau fenua Sotaiete, i te mau avae atoa
Te hoo e piti farane i te matabiti hoê.

Nu. 10.

Atopa 1930.

Mat. 24.

Te Faaroo no te Feia Mo'a Mau.

Ua iritihia teie nei parau na roto mai i te buka: "Te Hiro'a Faaroo"
i papaihia e Tamate Aposetolo; Faaauhia ei reo Tahiti e Elita.

HIRO'A FAAROO 13. *Te faaroo nei matou e, eiaha e
eia, eiaha e haavare, eiaha hoi e taiata, ei auu mara ra, e
te viivii ore, e te hamani-maitai-raa'tu i te taata atoa. * *
* * * * E mai te mea te vai atura te hoê mau mea
tia ra, e te mau mea viivii ore ra, e te mau mea popouhia ra,
e te mau mea roo maitatai ra, e feruri maite â ia matou i te
reira. --Iosepha Semita.*

(E tuatiraa teie nei parau.)

Uiraa 5. Eaha atoa ia te tahi moni i titauhia i roto i te
Ekalesia?

P. O te Tufaa Ahuru ia. Ua aufanhia te Tufaa Ahu-
ru, oia hoi te ahururaa no te mau taoa i roaa mai i mutaa
ihora; ua faaue maira te Atua ia haapao tatou i te reira i te-
ie nei â mahana. Ua na ô maira te parau no teie mahana
r e: "E mahana faatusiaraa, e mahana aufauraa no te ahu-
ruraa na ta'u mau taata; o tei aufau i te ahururaa e ore ia
e ama." (Buka Fafau 64:23-24)

Parau Tauturu: Ua haamatahia mai te aufauraa i te Tufaa Ahuru na mua roa aé i te tau no Mose. A hoí mai ai Aberahama mai te hoé tamai manuia, ua farerei oia ia Melehizedeka, horoa'tura "oia i te ahuru o taua mau taoá atoa o tei pau mai ia'na, no'na ra." Hió i te Genese 14: 28-20. Ua na reira atoa Iakoba i te fafau i te ahururaa no ta'na taoá i te Atua ra. Genese 28:22.

Ua etaeta roa te ture a Mose i te aufauraa i te Tufaa Ahuru. "E te tufaa ahuru atoa o te fenua, to te huero o te fenua, e te maa atoa no te mau raau ra, na Iehova ia; ua haamoáhia na Iehova:*** ete tufaa ahuru no te puaatoro e no te mamoe ra, i te mau mea atoa i taióhia ra, e moá te tufaa ahuru na Iehova." (Levitiko 27:30-32)

Te na ô atoa maira Malaki e: "E haru anei te taata nei i ta te Atua? Ua haru maira outou i ta'u ra. Te parau nei râ outou, I haru matou i ta oe i te aha? I te ahuru o te taoá ra o te mau ô. Ua roohia-mau-hia outou e te ino, ua haru mai hoi outou i ta'u, o te fenua taatoa nei â. Hopoi mai na outou i te ahuru atoa o te mau taoá i roto i te fare vairaa, ia maahia taua fare nei, e tamataraa te reira ia'u nei te parau maira Iehova Sabaota ra; i te oreraa vau i te iritiraa i te mau haamaramarama o te raí ra, a nini atu ai i te taoá rahi roa ei maitai no outou." (Malaki 3:8-10) E ua haapao-atua-hia ia i te tau o Iesu Mesia. A hió i roto i te Mataio 23:23

Uiraa 6. Ua riro te Tufaa Ahuru ei mono no te aha?

P. Uariro te reira ei mono no te *Amui-noa-raa Taoá*; no te mea ua puai aé to te taata hinaaro i ta ratou taoá i to ratou hinaaro i te Atua, e no to ratou nounou taoá ua manuia ore te amui-noa-raa taoá i rotopu ia ratou, e ua monohia'tura te reira e te Tufaa Ahuru.

Uiraa 7. Eaha ia te amui-noa-raa Taoá?

P. Te reira ia te hoé raveraa taoá i ravehia i mutaa ihora, e tei heheu-faahou-hia mai i teie nei mau mahana. Ai-

ta e rahi te parau no te faatereraa i te reira i roto i te Bibi-
lia; area râ ua ite tatou e, ua amui-noa-hia mai te taoá no
te Feia Moá atoa i roto i te rima no te feia toroa no te Eka-
esia e ua riro te reira na ratou atoa.

Parau Tauturu: "E hoé atura aau e hoé hoi varua to
taua feia rahi atoa i faaroo ra, aore roa te hoé i parau i ta'-
na taoá e na'na anaé iho, ua amui-noa-hia na ratou atoa, *
* Aore roa hoi te hoé o ratou i ere, e te feia atoa hoi e fe-
nua to ratou e te fare, hoo atura ia, e hopoi maira i te hoo
i taua mau mea i hoochia ra. Tuuhia ihora i raro i te pae a-
vae o te mau Aposetolo ra; e tufahia ihora na ratou atoa
e au maite aéra." (Ohipa 4:32-35) Ua haapao atoa Enoha
mai i te reira ture e no te reira ua tahoéhia to ratou mau ma-
naó e to ratou faaroo e ua rave-ê-hia'tura ratou i pihaiho i te
Atua. (Buka Poe Taoá Rahi. Mose 7:16-18)

Ua haapao atoa te Feia Moá i Amerika i te reira ture e
ua riro ratou ei feia maitai e te oaoa no te tahi na matahiti.
Aita râ ratou i tamau noa i te reira peu e ua teoteo ihora ra-
tou, e no reira ua tairi te Atua ia ratou e tae noa'tu i to ra-
tou paura. (A hió i te B. a M. IV Nephi 1:2-3, 16-24)

Uiraa 8. E mea nahea te faatereraa i te ohipa amui-
raa taoá, mai tei heheuhia mai i teie nei â mahana?

P. Ua horoahia te reira ture i te mau mahana no te
haamataraa o te Ekalesia i teie nei tau hopea. No to te Feia
Moá nounou taoá ua iritihia te reira e tae noa'tu i te taima e
nehenehe ia ratou ia ora maitai i roto i te reira raveraa.

Ia tae mai te taata i roto i te Ekalesia e horoa oia i ta'na
taoá atoa i te Ekalesia, e na ratou e fa'hoi mai i te tufaa e au
ia'na ia vai oia ei Fatu i nia iho i te reira mai te haapao mai-
tai-raa. Te reira te mau huru ohipa'toa e e rave te taata i ta'-
na tufaa ohipa mai te au i to'na ite. E tapea oia i te tufaa e au
no te maa e te ahu, e te mau mea-faaora no to'na utuafare,
e e horoa'tu oia i te toea i te Ekalesia ia haaputuputuhia te

reira ei tauturu no te ruau e tei pohe i te maí, e te faatiaraa i te ohipa na te Fatu. Eita hoi te taata faatau e faatiahia i roto, no te mea te na ô maira te ture e, ia ore outou e rave i te ohipa e ore outou e amu.

Uiraa 9. Eaha te haapiiraa na te Ekalesia no nia i te faaipoiporaa?

P. Te faatura nei matou i te mau haapiiraa no te mau tavini o te Atua, e i te parau na te Atua atoa hoi o tei faatia mai i te faaipoiporaa.

Te haapii nei matou e, ua haamaitaihia te faaipoiporaa e te Atua e Na'na iho te reira i tuu mai ia faaîhia te ao nei, o te hoé tumu ia no to'na hamaniraahia. Te na ô maira te haapiiraa e, ua tia roa i te taata atoa ia faaipoipo mai te mea aita to'na e maí e aore râ te tahi mea au ore i te huru faaipoiporaa. Ua ravehia te faaipoiporaa mure ore i roto i te hiero o te Atua e e maitai ia tomo te taata no te reira faaipoiporaa. Mai te mea râ e, aita e nehenehe ia'na ia haere i roto i te hiero no to'na viivii e aore râ no to'na iho hinaaro, e faatia matou i te faaipoiporaa no teie ao anaé, e ua haamaitaihia te reira e to te Autahúaraa; area râ no teie ao anaé te reira faaipoiporaa, e ua ore te reira i te poheraa o te taata.

Parau Tauturu. Te na ô maira te parau papai e, "Ua parau i hora te Atua ra o Iehova, E ere ia te mea maitai ia parahi noa Adamu oia anaé ra." (Genese 2:18) No reira ua horoahia te vahine ei tauturu na'na, e ua riro atura raua ei hoé. (Irava 24) Ua faaue atura Oia ia raua e: "Fanau orua e ia rahi roa, e faaî i te fenua nei." (Genese 1:28)

Noa'tu te maitai o te taata iho te vai ra te maitai hau roa ra i roto i te fanauraa i te tamarii ia pee ratou na muri i te metua e ia haere â ratou i mua ia'na ra. E aita e nehenehe i te taata ia fanau oia anaé ra, maori râ ua apitihia oia.

Ua na o maí te Atua e: O tei faaore i te faaipoiporaa, e ere ia oia i te mea faatiahia e te Atua. (Buka Fafau 49:15) A hio atoa i te I Timoteo 4:1-3.

(E Tuatihia teie nei parau.)

E AAMU

“E Tihare e, i hea oe i teie mahana?” na te orometua haapiiraa ia i te tahi pipi na’na ra. Ua pahono atura Tihare ia’na, “Ua haere au na te purumu nei e tae atu ai i te mataeinaa matamua, ei reira ua hoí mai na te pae mouá. Aita râ vau i ite i te hoé mea i faaanaatae ia’u; ahiri râ i rahi te taata e mea huru maitai aé.”

Ua ui mai te orometua ia’na, “Tei hea ra Viliamu? O orua ia te haereraa atu, e ere anei?” Ua parau atura Tihare ia’na, na ô atura: “Oia, o maua iho â i te haereraa atu, te-ra râ ua fiu vau i te tiaí noa ia Viliamu, oia i faaea noa i te mau vahi atoa e mataitai i te tahi mea e i te tahi mea. Ua haere atu vau i to’u haereraa, o vau anaé iho.”

Ua maoro rii e ua tae mai Viliamu, ua rari ra e ua repo hoi to’na ahu. Ua mauruuru roa oia i to’na ori haere noa raa i taua ahiahi ra. Ua î to’na pute piripou i te tahi mau mea e tei roto i to’na rima te hoé ofai huru ê. Ua na o atura oia i to’na orometua, “Ua ite au i te hoe manu apî i teie mahana, e mea patapata to’na pererau e e mea navenave to’na reo ia himene. I te vahi i tapiri ai te purumu i te uahu ua ite au i te hoe pahi apî mai. Te hurihia ra te hoé mau afata maa e ua tupu to’u maere no te mea e mau maa apî ia’u. I to’u hoiraa mai na te pae mouá na ite au i te hoé marae no te tau tahito. Ua papai au i te hoe hohoá no to’na huru ia ore ia moe ia’u, e ua afai mai au i teie ofai no nia mai i te reira. E au teie ofai i te hoé toi no te tau tahito. E i te pae anavai te hio ra vau i te hoé mau iá, topa atura vau i roto i te pape, no reira vau i rari ai e i repo ai to’u ahu nei.

Ua parau atura te orometua ia raua, “Hoé iho â vahi ta orua i haere i teie nei mahana. E Tihare, aita oe i ite i te hoé mea i faaanaatae ia oe, e o Viliamu râ, e haapii oia i teie hepetoma atoa ia pâpû te mau mea ta’na i ite i teie mahana. Oia atoa i roto i teie oraraa nei, e haere te tahi i to’na hae-

reraa mai te matapo te huru, e te tahi ra, e mata araara to'na i te mau mea ta'na i hió ra. O te haere matapo noa i roto i teie nei ao, e ati to'na, e o te haere mai te mata araara, te ite ia te noaa ia'na. Ua ite au i te tahi mau mataro pahihia tei haati i teie nei ao, aita ratou i ite i te hoé mea ia uihia e te feia paari. Ua ite râ vau i te tahi mau taata e ia haere ratou hoé hanere metera e ite iho â ratou i te hoé mea apî ia ratou. E no reira Viliamu, e na reira noa oe i te imi haere i te mau mea apî ia haere i to oe tere, noa'tu te poto e aore te roa ta oe e haere. E o oe ra, e Tihare e, ua horoahia to oe mata ia hió oe i te mau mea i mua ia oe. Ia ore te taata mata maitai ia hió i te mau mea i mua ia'na ua hau to'na matapo i to te taata matapo ihora."

—*Papaihia e Mati*

E Pahonora a Tano

I te hoé po i mairi aénei a faaroo ai te hoé orometua Momoni i te radio, oia hoi te parau niuniu, i roto i te fare o to'na hoa i te fenua i Amerika, ua tae mai te parau na nia i te radio no te reva mai, "E teie nei e faaroo outou ia R. C. Preble, o te hoé taata tuiroo no ta'na mau pahonora a maramarama i nia iho i te mau uiraa i uihia ia'na e te tahi mau taata." E i reira ua tae mai te reó o taua taata ra o Preble.

I taua po ra ua haapararehia taua radio parau ra i nia i te taatoaraa o te fenua Amerika. E no reira te mau taata atoa, e radio ta ratou, o tei faatano i ta ratou radio, ua faaroo ratou i te mau parau a taua taata maramarama ra. E taata oia no rapae i te Ekalesia Momoni e e mea rahi te mau uiraa ta'na i pahono atu na nia i te radio.

I taua po ra, te uiraa i uihia ia'na e te hoé taata no te tahi haapaoraa ê, o teie ia, "Eaha te buka o tei faaite pâpû

mai ia tatou e, nofea mau te Inidia Marite.” Aita teie taata tuiroo i haamaoro i to’na feruriraa. Ua na ô maira oia e, “Te Buka a Moromona.” E i reira ua parau atu â oia i nia iho i te reira, oia hoi e mea nafea te horoaraahia mai taua buka ra ia Iosepha Semita e te hoé melahi no te raí mai, e ua ravehia ia no roto mai i te hoé aivi, e ua iritihia ia na roto i te hoé mea mai te titeamata te huru i itehia i roto i te afa-ta i pihai iho i te mau api auro. Ua faaite atoa oia, tei roto i te Buka a Moromona, te parau tuatapapa no te hoé pûpû taata tei faarue ia Ierusalema e 600 matahiti hou te Mesia e ua haere ratou na roto i te medebara e tae noa’tu i te pae miti e i reira ua tere ratou na nia i te moana e, tae roa’tu i te fenua Amerika i te pae i te toóá ó te râ. E i reira ua parahi ratou, e ua faatia ratou i te tahi mau oire rarahi e te nehe-nehe. I muri mai râ ua purara ratou na nia i te tahi mau vahi i te pae apatoerau i Amerika, e ua haapaahia te pae itoito o teie mau taata e te tahi i parauhia te ati Lamana o tei itehia i teie mau mahana i te i’oa, te Inidia Marite. Te parau tuatapapa i noaa ia Iosepha Semita o te parau tuatapapa ia i haapaahia e te pae itoito o taua mau taata ra, oia hoi te ati Nephi. E ua na reira oia i te faaite atu i to Amerika i te huru o te Buka a Moromona.

Ua maere te orometua Momoni a faaroo ai oia i te mau parau a teie taata no rapae i te Ekalesia. Ua mauruuru râ oia, e no reira ua papai oia i te hoé rata i taua taata tuiroo ra. I roto i taua rata ra ua faaite te orometua e, ua mauruuru oia i te pahonora ta’na i faaroo, e e mai te mea ua hinaato teie taata i te ite i te tahi mau haapiiraa i nia iho i ta te Haapaoraa Momoni, na’na e faaite atu ia’na i te reira. Ua papai atu’tu te orometua, mai te mea aita ta’na e Buka a Moromona e horoa oia i te hoé buka na’na ra.

Aita i maoro, ua tae mai te pahonora i te orometua. Ua mauruuru taua taata ra no te rata ta’na i farii e ua hi-

naaro oia i te Buka a Moromona e i te tahi mau haapiiraa atoa na te Ekalesia Momoni. E no reira ua haponu atu te orometua i taua mau mea ia'na ra.

E homa, e mea huru ê ro te ao nei i teie mau mahana. Te ite nei ratou i te parau mau e te faufaa no te mau haapiiraa a te Ekalesia Momoni. Ua ite atoa ratou i te huru o te mau taata no te Ekalesia, te feia apî e te feia paari, e mau taata maramarama, e aita ratou i hinaaro i te mau mea vii-vii o teie nei ao. Te haere noa nei to te Ekalesia i mua, e eita ratou e faaea no te mea e, tei roto i te rima o te Atua te ohipa faatereraa a te Ekalesia a Iesu Mesia i te Mau Mahana Hopea Nei, o te ore roa ia e mou, e e ore roa e riro ia vetahi ê, e vai te reira e a muri noa'tu.

—*Papaihia e Eduana*

UTAHA

I te matahiti 1830 i te avae Mati, ua neneihia e ua tabukahia te Buka a Moromona. Ua fariihia e Iosepha Semita te mau parau tuatapapa e te mau heheuraa no te iritiraa i taua buka ra. Hou te nenei-raa-hia e te ite-raa-hia o taua buka, ua haamata te orurehau e te peapea i rotopu i te mau taata. Ua tupu noa te peapea i te rahiraa, e ua hamani-ino-hia Iosepha e ta'na ohipa. I muri iho ua faarue Iosepha i te hau Nin Ioka e ua haere oia i te hau Ohio. I reira oia i poro haere ai i te Evanelia, e ua rahi te mau taata tei farii i te reira. Ua tiavaruhia râ oia e te mau taata i titau ia'na, e ua haere oia i te fenua Missouri. Na reira noa i te tiavaruhia i te tahi vahi e i te tahi vahi. Ua faaino-noa-hia oia, ua titauhia oia e taparahi, ua hurihia oia i roto i te faie auri. Ua faaoromai oia i te mau ati mai te mau peropheta tahito e mai to tatou Faaora hoi. No te aha? No to'na faaroo. Ua ite pâpû oia i te parau mau e ua haamanihia to'na toto e

ite no to te ao atoa nei mai te Mesia.

I te poheraa o te Peropheta, i te matahiti 1844, ua faaea anei te faainoraa e te haapeapearaa i te Feia Moá? I te matahiti 1845 ua tae mai e toru taata no te hau Marite, ma te parau e, "Ua ite matou e, e feia parau tia outou, no te ino râ i roto i te mau haapaoraa êê, aita e nehenehe ia outou e parahi i ó nei ma te hau, e te hinaaro nei matou e, ia faarue outou i teie vahi e ia imi i te tahi vahi faaeearaa no outou."

Ua faatia te Feia Moá i to ratou hinaaro e i te matahiti 1846 ua faarue ratou ia Navu e ua haere ratou i te medebara i te tooa o te râ, e ua faatia haere ratou i te mau vahi parahiraa no te feia veve e te paruparu tei ore i nehenehe ia ratou ia haere noa i to ratou haereraa.

I to ratou taeraa i Utaha, e vahi ano e te medebara ia. Ua taparu te Feia Moá ia Birikama Youne, i te na ôraa e, "A haere tatou i te pae miti i te vahi nehenehe, i te vahi tiare tei faanoanoa i te reva i te mau tau atoa, tei reira te faufaa e te hau."

Ua pahono maira oia, "E parahi tatou i ó nei, e faaruperupe tatou i teie vahi ano mai te roti. E faaoti tatou i te parau i papaihia."

Ua faaea ratou i reira, e i muri iho ua itehia te piru i te fenua ra i Tarafonia, e ua parau faahou mai ratou, "Ahiri e, ua haere tatou i Tarafonia, ua faufaahia ia tatou, ua i roa te fenua i te piru, a haere, a haere anaé tatou i reira."

Ua faatoro maira Birikama Youne i to'na rima e ua parau mai oia, "Ratou o tei hinaaro e haere, a haere, e parahi râ matou i ó nei. E te parau atu nei au ia outou, ratou te parahi i ó nei e haapao i te parau, e nehenehe ia ratou ia hoo i ta outou mau faufaa, e tae noa, tu i te ahuru o te reira."

E homa e, i taua taimera, aita Birikama i ite i te faufaa i roto i te mau mouá i Utaha e te mau raau e tupu nei i reira. Te ravai ra te arahu no to te ao atoa nei e hoé hane-

re matahiti, e rahi atu â te piru e te ario i Utaha i tei Tarafonia, e veo anaé to roto i te tahi mau mouá, ua mirioni te mau tane e iritihia nei no roto mai i taua mau mouá ra.

E ere ia te ite no Birikama iho, a parau atu ai oia: "TE-IE TE VAHI." Na te Atua i horoa mai i te ite ia'na, na te Atua i aratai i te Feia Moá i nia'é i te tupuai mouá.

Isaia 2:2. "E riro ia tae i te mau mahana hopea ra, e faatiahia te mouá ra o te fare o Iehova i nia i te tupuai mouá, e faateiteihia ia i nia'é i te mau aivi; i tairuru atoa mai te mau etene atoa ra i reira."

—*Papaihia e Harave*

Te Mau Parau Apî

23 MAHANA I ROTO I TE REVA

I te fenua ra i Amerika, te faatere noa ra na taata toopiti i te hoé pahi reva ia roaa ia raua te rê matamua no te matoraraa i nia i te reva. E i teie nei ua riro te rê ia raua. Ua tae te taioraa o te mau hora i te 554, oia hoi e piti ahuru ma toru mahana ta raua i parahi i roto i to raua pahi reva i roto i te reva. Aita raua i hoí mai i raro i te fenua nei i roto i te ra taima e piti ahuru ma toru mahana. E noa'tue, ua riro te rê ia raua, te faatere noa nei raua i to raua pahi reva. Aita raua i hinaaro i te hoí mai e tae noa'tu i te 1,000 hora te matoro o to raua tere, oia hoi ia fatata i te ono hebetoma, ei reira raua e hoí mai ai.

E TAPARAHIRAA TAMARII

No to'na riri i to'na hoa, ua pupuhi te hoé tamahine naí-naí i te tahi tamahine naí-naí. Te hauti ra raua i roto i te aua i pihai'ho i te hoé fare e ua riri Goloria ia Roti no te hoé mea ta'na i rave. E ua na ô maira Goloria, "E pupuhi au ia oe," e i reira ua horo oia i te fare e na hoí mai oia

ma te hoé pupuhi naínaí i roto i to'na rima. Te haere atura Roti e a haere atu ai oia ua pupuhia mai oia e Goloria i te pae tua, e ua pohe roa oia. E ohipa tamaríi teie, area rá a hió na i te hopea. E toru matahiti to Goloria e to to'na hoa ta'na i pupuhi, e ono matahiti ía. No te apí ra o Goloria aita te mau haava i faahapa ía'na no te taparahiraa tamaríi. Ua faaite mai ratou e, aita taua tamahine naínaí ra i ite i te mea ta'na i rave e aita e nehenehe ía faahapa i te tamaríi no te hara taparahiraa taata, mai te mea aita ratou i tae i te ahuru aore o to ratou matahiti.

3,000 TAATA POHE I TAINA

Ua pohe e toru tauatini taata i te fenua ra i Taina i te hoé ati rahi tei tae i reira. No te rahi o te ua tei mairi i reira ua haono te mau anavai e ua haaparari te pape i te mau fare mai te haapohe i te mau taata. E rave rahi te mau tinu pohe tei itehia i te painuraa i nia i te mau anavai i to ratou haereraa i te miti. Ua faufaa ore-hia te mau pereoo auahi no te rahi o te pape e no reira ua ati roa te toea o te mau taata no te mea aita i nehenehe ía afai atu ía ratou i te maa e i te tahi mau mea tanturu ei faaora ía ratou.

E PURE NO TE UA

I te hoé oire i Amerika, o tei parauhia Winchester Virginia, ua tae te oé i nia ího i te fenua e ati noa'é i taua vahi ra. E no te marôraa o te fenua aore roa te mau raau i faahotu mai i te maa, e ua ati roa te mau taata. I te hoé mahana i mairi aénei ua haaputuputu te mau taata atoa o taua oire i mua ra i te fare hau, e ua pure ratou i te Atua ía haamairi oia i te ua i nia ího i taua vahi ra. Ua faaterehia te pureraa e te mau orometua no taua oire ra, e e hoé hora te maororaa o te pureraa. Ua opánihia te mau fare toa e te mau vahi raveraa ohipa ía haere te mau taata atoa i te pureraa.

E HAPE RAHI HOI

Ua fanau na vahine toopiti i roto i te fare mai i te oire o Chicago i te fenua ra i Amerika. Hoé â taimē teie na fanau-raa e piti, e na te mau taote i haapao na aiu, e a ora'i taua na mama toopiti ra ua afai atu te hoé i to'na aiu i to'na iho fare e na te tahi i afai atu to'na aiu i to'na iho fare. E hoé ahuru mahana i muri mai râ, a faahopu ai te hoé mama i to'na aiu, ua ite oia i te hoé tapao papairaa i tapirihia i nia iho i to'na aiu, e i nia iho i te reira ua papahia te ióa o te tahi vahine. Te reira i hora mahana ua itehia e te tahi vahine te ióa ê i nia iho i to'na aiu. Ua tupu ia te peapea, e aita raua i pâpû na vai teie aiu e na vai tera aiu. Ua anihia te mau taote e raua ia haere mai e hiopoa maitai i taua na aiu toopiti ra. E ono hebetoma i muri iho i te fanauraa ua pâpû ia raua e, ua hape te raveraa o teie na aiu, e no reira ua tau i raua i to raua na aiu e i teie nei ua afaro faahou taua na utuafare ra.

UA MOE TE HOE MOTU

Ua tomo roa te motu ra o Amok Krakatao, e i te reira vahi te vai nei te miti anaé i teie nei mahana. Na te hoé aueue-puai-raa o te fenua i taua vahi ra i faatupu i teie mea maere. Aore e taata i parahi i nia iho i te motu a horomii ai te miti i te reira.

PARAU FAAITE

I te 5 no Atopa i te hora 7 i te po, e faatere matou i te hoé haapiiraa hohoá nehenehe i roto i to matou fare pure-raa i Orovini. Te ani atu nei matou i to Papeete ia haere mai e mataitai i taua haapiiraa hohoá ra. No reira, a haamanaó outou, e to Papeete, i te mahana Tapati, te 5 no Atopa i te hora 7, i te fare pureraa Momoni i Orovini. A haere anaé mai outou paatoa.

M. Bonnet M. Gerant et Imprimeur,

Rue Brea et de la rue Dumont d'Urville, Orovini, Papeete